



16. marts 2017

UPA 2017/167

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Suliniut MANU-p ineriartorteqqinneratut isigineqarsinnaasumik nuna tamakkerlugu angajoqqaanut atuarfimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angajoqqaanut atuarfik aallartinneqassaaq 1. juuli 2018-mi.

(Inatsisartunut ilaasortaq Nivi Olsen, Demokraatit)

Tunngavilersuut

Meeqqat tamarmik pisinnaatitaaffigaat toqqissimasumik angerlarsimaffeqassallutik, isumassorneqarlutik asaneqarlutillu. Kisianni amma pingaarpoq meeqqatsinnik perorsaarnissarput ilinniartillugillu, qanoq pissusilersornissaannut aamma qanoq inunnut allanut ataqqinnissanersut.

Nukillalaarnartaqaaq takullugit meeqqat inuusuttullu amerlavallaat pissusiluttut, ataqqinningsut aamma atuarfimmi pissusissanut malinnaangitsut, akunnerminni aamma inersimasunut.

Tamakku - ataqqinnineq, ileqqorissaarneq, pissuserissaarneq, pissusissanut malinnineq - angerlarsimaffimmi ilinniagassaapput atorneqartartussat inuit allat peqatiginerini.

Tamanna tunngavigalugu Demokraatini isumaqarpugut isumassarsiatsiallaassasoq nuna tamakkerlugu angajoqqaanut atuarfeqarlersuuppat, tassani Peqqinnissaqarfik siusinaarluni akisussaaffigilertassavaa angajoqqaanngortussat sakkussanik tuniorarlugit ilinniartinneqartalernissaat meeqqat peroriartornerat tamakkerlugu angajoqqaajulluarsinnaanngortillugit. Atuartitsineq ingerlasassaaq meeqqap marlunnik ukioqalernissaata tungaanut aamma tamanna isigineqassaaq suliniummik MANU-mik ineriartortitseqqinnertut pitsanngorsaanertullu.

Suliniut MANU-mi angajoqqaanngortussat neqeroorfigineqartarput naartunerup pileqqaarneraniit meeqqat qulingiluanik qaammateqalernissaata tungaanut akunnerit sisamaat avillugu sivilissusilimmik qulingiluarluni pikkorissarnissaminnut. Suliniut MANU-mi pingaartillugit sammineqartarput meeqqap inunngorlaap pisariaqartitai massakkorluinnaq, tamatumalu samminissaa pingaaruteqarpoq meeraq inuunermini aallartilluaqqullugu.

Kisianni Demokraatini atuartitsineq sivitsorusupparput tamakkiisumik perorsaanerup, meeqqerivimmik/atuarfimmik suleqarnissap, allanut ataqqinninnissap, pissusissanut malinnaanerit

kiisalu inuttut naleqartitat atuartitsissutigineqartarnissaat pillugu. Tamatuma saniatigut angajoqqaanut atuarfiup imminut naleqartinneq annertusaaqataaffigisinnaavaa, pitsaasumik aningaasaqarnissaq paasissutissiissutigisinnaavaa siunnersuinerlu ingerlallugu aamma ilaqutariinni meerartalinni peqqinnartumik inuuneqarneq, kulturikkut eqeersaasinnaavoq, angajoqqaat sakkortuumik meeraasimasut/inneqarsimasut misigissusaannik ammaaqataasinnaavoq taamatullu aamma angajoqqaanut kaammattuisinnaavoq inuunerminnut paasinninnissaannut taamaasillunilu meeraaneq pitsaasoq toqqossimasorlu ikorferlugu.

Demokraatini naatsorsuutigaarput nuna tamakkerlugu angajoqqaanut atuarfissap ullumikkut suliniutip MANU-p atugaanik ininik atuisinnaassasoq. Taamaattumik nutaamik illuliornissaq pisariaqartussanngilaq aamma ulluminut naleqqiullugu atuartitsivissanik attartornissamut imatut immikkut aningaasartuuteqartoqartariaqassanngilaq.

Nuna tamakkerlugu angajoqqaanut atuarfissami ilinniartitsisussat eqqarsaatigalugit, isumaqarpugut allatut eqqarsarsinnaasariaqartugut, peqqinnissaqarfimmi sulisuinnaaq atuartitsisut atorumanagit. Neriuppugut assersuutigalugu utoqqartagut (soraarninngornikut) akuutinneqarsinnaajumaartut, oqaluttuarisinnaammassuk qanga atugarissaarfiunngikkallarmat qanoq iliorlutik qitornarpassuatik perortittarsimanerlugit kisianni immaqaa aamma taamani kulturikkut pingaartitsisoqarallarmat naleqartitanillu peqarluni. Taamatut assinganik aamma soorlu aalisartut piniartullu taakkulu nuliaat atorluarneqarsinnaapput, oqaluttuartaillugit qanoq ingerlaqqittarsimanersut piffiit imaannaanngitsorsuusaraluartut.

Nuna tamakkerlugu angajoqqaanut atuarfiliornikkut inuiaqatigiittut ersarissarsinnaavarput, sunik angajoqqaat isumalluarfiginerlutigit aamma ataatsimoorluta perorsaalluarnissamut pissuserissaarnissamullu tunngavissanik sanasinnaavugut, angajoqqaat peqataatillugit.

Demokraatini iluaqutissartalittut isigaarput suliniutip pioreersup ineriartorteqqinnissaa (Suliniut MANU) nutaamik nassaarniaqinata naqqaniik ineriartortitassatsinnik.

Demokraatini isumaqarpugut nuna tamakkerlugu angajoqqaanut atuarfik 1. juuli 2018-mi aallartittariaqartoq taamaattumik aamma 2018-mut Aningaasanut Inatsisissamut atatillugu aningaasaliinissaq pingaartittariaqarparput.

Partiit allat oqaaseqaataasa tusarnissaannut kiisalu Naalakkersuisut akissuteqarnissaannut qilanaarpugut.

Aningaasatigut allaffissornikkullu pisortanut kingunerusussat

2017-mut Aningaasanut Inatsimmi ukiunullu missingersersuusiorfiusunut ukiumut 2,5 millioner koruunit immikkoortinneqarnikuupput "Suliniut Inuusamut" aamma "Suliniut meeqqamut piareerpungamut".

Naatsorsuutigineqassaaq nuna tamakkerlugu angajoqqaanut atuarfimmik aallartitsinermut, siunnersuummi allaaserineqareersutut, immikkut allanik aningaasartuuteqartoqassaaq. § 37 naapertorlugu apeqqummut 2017-111-mut Naalakkersuisut akissuteqarnerminni aningaasartuutaajumaartussat taggissinnaasimanngilaat. Uangali isumaqarpunga ullumikkut atorneqartartunut naleqqiullugu marloriaammik immikkoortitsisoqartariaqassasoq, atuartitsineq marloriaammik sivisussuseqartup missaani ingerlanneqartartussaamat. Ullumimut naleqqiullugu pisortanut immikkut aningaasartuutit ukiumut 2,5 millioner koruuniussasut

naatsorsuutigineqarpoq. Aningaasat taakku 2018-mut Aningaasanut Inatsimmi ukiunilu missingersersuusiorfiusuni pingaartillugit immikkoortinneqassapput.

Aningaasatigut allaffissornikkullu sullivinnut namminersortunut kingunissai.

Soqanngilaq.

Aningaasatigut allaffissornikkullu innuttaasunut kingunissai

Angajoqqaanngortusat tamarmik nuna tamakkerlugu angajoqqaanut atuarfimmi atuarnissartik piffissaqarfisassavaat. Atuartitsineq tamatuma saniatigut angajoqqaanut akeqassanngilaq.